

BOARD / RAAD**NO. R. 1204****30 SEPTEMBER 2016****WET OP BEMARKING VAN LANDBOUPRODUKTE, 1996 (WET NO. 47 VAN 1996)****INSTELLING VAN STATUTÊRE MAATREËL EN BEPALING VAN RIGLYNPRYS:
HEFFINGS BETREFFENDE KORING EN GARS**

Ek, Senzeni Zokwana, Minister van Landbou, Bosbou en Visserye, handelende kragtens artikels 13 en 15 van die Wet op die Bemarking van Landbouprodukte, 1996 (Wet No. 47 van 1996) –

- (a) stel hierby die statutêre maatreël in die Bylae uiteengesit in; en
- (b) bepaal hierby die riglynprys, per metrieke ton, vir –
 - (i) koring as R3 699.00; en
 - (ii) gars as R3 000.00.

SENZENI ZOKWANA,

Minister van Landbou, Bosbou en Visserye.

BYLAE

Woordomskrywing

1. In hierdie Bylae het enige woord of uitdrukking waaraan 'n betekenis in die Wet geheg is, daardie betekenis en tensy uit die samehang anders blyk, beteken —
- **“die Trust”** die Wintergraantrust, Registrasie No. IT 11410/97;
 - **“die Wet”** die Wet op die Bemaking van Landbouprodukte, 1996 (Wet No. 47 van 1996);
 - **“gars”** korrels van die genus *Hordeum*;
 - **“goedgekeurde silo-eienaar”** 'n silo-eienaar wat deur die klaringshuis goedgekeur is;
 - **“invoerder”** enige persoon wat wintergraan uit 'n ander land in die Republiek van Suid-Afrika invoer;
 - **“JSE”** die Johannesburgse Effektebeurs of sy opvolger in titel;
 - **“klaringshuis”** die JSE Kommoditeitsklaringshuis of enige ander regspersoon of nie-ingelyfde organisasie of departement van die JSE Securities Exchange South Africa wat erken word deur die Registrateur van Finansiële Markte;
 - **“koring”** korrels van die spesie *Triticum aestivum*;
 - **“produsent”** 'n persoon wat wintergraan produseer of 'n persoon in wie se belang wintergraan geproduseer word;
 - **“silo-ontvangsbewys”** 'n oordraagbare dokument wat gebruik word as simboliese lewering van die betrokke produk en wat uitgereik is deur 'n goedgekeurde silo-eienaar in die voorgeskrewe vorm en op die voorwaardes uiteengesit in die JSE Futures Contract;
 - **“SAGIS”** die Suid-Afrikaanse Graaninligtingsdiens NPC, 'n besigheid sonder winsoogmerk ingelyf kragtens die Maatskappywet, 1973 (Wet No. 61 van 1973); en
 - **“wintergraan”** koring en gars.

Oogmerk en doelwit van die statutêre maatreël en verband daarvan met die Wet

2. Die oogmerk en doelwit van hierdie statutêre maatreël is om finansiële ondersteuning aan wintergraan navorsings-, inligtings- en ontwikkelingsfunksies te verleen wat deur die wintergraanbedryf as noodsaaklik en in belang van die bedryf geïdentifiseer is.

Die instandhouding van makro bedryfsinligting word deur die wintergraanbedryf en deur direk geaffekteerde partye as noodsaaklik geag vir strategiese beplanningsdoeleindes. Die verskaffing van generiese markinligting op 'n deurlopende basis aan alle rolspelers is krities om die mark doeltreffend te laat funksioneer.

Die wintergraanbedryf ondersteun die beginsel dat generiese markinligting deur middel van statutêre maatreëls in terme van die Wet verkry moet word, en dat SAGIS die amptelike voertuig is om dit te bereik. SAGIS is ook die amptelike inligtingsdiens vir die mielie-, sorghum- en oliesadebedrywe. 'n Statutêre heffing word vereis om te verseker dat die wintergraanbedryf ook deel in die versameling en verspreiding van markinligting.

Behoorlike en akkurate wintergraanmarkinligting, wat deurlopend en tydig beskikbaar is, verbeter nie slegs marktoegang vir alle markdeelnemers nie, maar bevorder ook die doeltreffendheid van die bemaking van wintergraan en wintergraanprodukte. Behoorlike markinligting bevorder ook die lewensvatbaarheid van die wintergraanbedryf en die landbousektor in die breë. Markinligting bevorder voorts ook voedselsekerheid deurdat die mark beter kan funksioneer, aangesien inligting oor nasionale voorraadvlakke van wintergraan beskikbaar is.

Dit word van die landbousektor verwag om voedselsekerheid te verseker, die ekonomie te versterk en werksgeleenthede te skep. Hierdie doelwitte is in ooreenstemming met die bepalings van artikel 2(3) van die Wet. Om hierdie doelwitte te bereik en die wintergraanbedryf se mededingende posisie te bevorder, is volgehoue navorsing noodsaaklik.

Volgens navorsers hou die prestasies van die Suid-Afrikaanse landbousektor verband met die ontwikkeling en toepassing van landbounavorsingsresultate. Die komplekse interaksie tussen die veranderde gedragspatrone van oeste en die eksterne faktore wat dit beïnvloed, soos plaë en siektes, raak produksie en kwaliteit nadelig en skep 'n dringende behoefte aan nuwe tegnologie om die landbousektor winsgewind te hou. Verbruikersvoorkeure moet ook deurlopend in gedagte gehou word. Verder is 'n spesifieke infrastruktuur met betrekking tot navorsing oor tyd gevestig en dit is noodsaaklik dat hierdie infrastruktuur behoue bly en behoorlik in stand gehou word.

Om die opbrengs uit uitvoere te optimaliseer, is dit noodsaaklik dat Suid-Afrikaanse produkte voldoen aan internasionale kwaliteitstandaarde. Navorsers moet toesien dat plaaslik geproduseerde wintergraan mededingend is en dat dit so bly op internasionale markte.

'n Deel van die fondse wat by wyse van die heffing ingevorder word, sal toegespits word op kleinskaalse boere en transformasie in die wintergraanbedryf.

Hierdie statutêre maatreël sal deur die Trust geadministreer word. Die heffings wat gevorder word ten opsigte van die onderskeie kommoditeite, sal in afsonderlike rekeninge geadministreer word. Die Trust sal deur die Ouditeur Generaal geouditeer word volgens algemeen aanvaarde rekenkundige praktyk.

Oor die afgelope aantal jare het die Wintergraantrust 'n toename in aansoeke vir die befondsing van navorsing ondervind, wat nie binne die Trust se beskikbare fondse geakkommodeer kon word nie. Derhalwe is fondse nodig om die afname van fondse vir navorsing uit ander bronne goed te maak en ook om vir die befondsing van nuwe navorsingsprojekte te voorsien. Die berekening van 'n voortgesette heffing en die begroting van die Wintergraantrust is egter afhanklik van die Staat se voortgesette proporsionele bydrae tot wintergraanavorsing.

In die berekening van die bedrag van die heffings waarvoor aansoek gedoen word, is in ag geneem dat 'n afsonderlike heffing vir ondersteuning van saadteelprogramme vir koring en gars sal geld.

Produk waarop statutêre maatreël van toepassing is

3. Hierdie statutêre maatreël is op wintergraan van toepassing.

Gebied waarin statutêre maatreël van toepassing is

4. Hierdie statutêre maatreël is in die geografiese gebied van die Republiek van Suid-Afrika van toepassing.

Instelling van heffing

5. 'n Heffing word hierby opgelê op alle wintergraan –

- (a) wat deur of namens die produsent daarvan verkoop word;
- (b) wat in die Republiek van Suid-Afrika ingevoer word;
- (c) wat verwerk of omskep word of laat verwerk of omskep word in 'n wintergraanprodukt, indien die wintergraanprodukt bestem is om van die hand gesit te word;
- (d) wat uit die Republiek van Suid-Afrika uitgevoer word, indien die heffing ten opsigte van sodanige wintergraan nog nie ingevolge paragraaf (a), (b) of (e) betaal is nie; en
- (e) ten opsigte waarvan 'n silo-ontvangsbewys uitgereik word, indien die heffing ten opsigte van sodanige wintergraan nog nie ingevolge paragraaf (a) of (b) betaal is nie.

Bedrag van heffing

6. Die bedrag van die heffing (Belasting op Toegevoegde Waarde uitgesluit) is soos volg:

Kommoditeit	Periode	Bedrag (BTW uitgesluit)
Koring	1/10/2016 tot 30/09/2017	R 10.00 per metrieke ton
	1/10/2017 tot 30/09/2018	R 10.70 per metrieke ton
	1/10/2018 tot 30/09/2019	R 11.40 per metrieke ton
	1/10/2019 tot 30/09/2020	R 12.25 per metrieke ton
Gars	1/10/2016 tot 30/09/2020	R 5.00 per metrieke ton

Persone deur wie die heffing betaalbaar is

7. (1) 'n Heffing wat in terme van klousule 5 opgelê is, sal betaalbaar wees deur:
- (a) in die geval van 'n heffing in klousule 5(a) bedoel, die koper van die wintergraan;
 - (b) in die geval van 'n heffing in klousule 5(b) bedoel:
 - (i) die koper van die wintergraan waar die wintergraan deur die invoerder verkoop word; en
 - (ii) die invoerder van die wintergraan waar die invoerder ook die verwerker daarvan is.
 - (c) in die geval van 'n heffing in klousule 5(c) bedoel, die verwerker of omskepper van die wintergraan;
 - (d) in die geval van 'n heffing in klousule 5(d) bedoel, die uitvoerder van die wintergraan; en
 - (e) in die geval van 'n heffing in klousule 5(e) bedoel, die persoon wat sodanige silo-ontvangsbewys uitreik.
- (2) Die bedrag van die heffing wat in terme van subklousule (1)(a) en (b)(i) deur die koper betaalbaar is, kan van die koopprys wat aan die produsent of die invoerder betaalbaar is, afgetrek word.
- (3) Die bedrag van die heffing wat in terme van subklousule (1)(e) deur die uitreiker van die silo-ontvangsbewys betaalbaar is, kan van die persoon aan wie sodanige silo-ontvangsbewys uitgereik word, verhaal word.

Betaling van die heffing

8. (1) Betaling van 'n heffing opgelê in terme van klousule 5 sal nie later nie as die laaste dag van die maand volgende op die maand waarin die wintergraan aangekoop, omgesit, verwerk of uitgevoer is, of 'n silo-ontvangsbewys uitgereik is, geskied deur die persone in klousule 7 bedoel.
- (2) Betaling moet ten gunste van die Wintergraantrust gemaak word.
- (3) Betaling moet –
- (a) wanneer per pos gestuur, geadresseer wees aan
Die Administrateur
Wintergraantrust
Posbus 7088
CENTURION
0046

- (b) wanneer per hand afgelewer, afgelewer word by -
Die Administrateur
Wintergraantrust (Blok C)
Agri-Hub Kantoorpark
Witheritestraat 477
Die Wilgers
0184

Voorwaardes van goedkeuring

9. Hierdie statutêre heffing is onderworpe aan die volgende voorwaardes:
- (a) Dat 70% van heffingsinkomste spandeer word aan navorsing, inligting, en ander funksies, ten minste 20% op transformasie (ontwikkeling van swart boere) en nie meer as 10% op administrasie;
 - (b) Dat die heffings bestuur word op 'n manier aanvaarbaar vir die Ouditeur-Generaal, apart van enige ander bates of fondse van die Wintergraantrust en geoudit word deur die Ouditeur-generaal; en
 - (c) Dat die aanwending van enige surplusfondse wat na die heffingstermyn mag bestaan, onderhewig sal wees aan die goedkeuring van die Minister.

Inwerkingtreding en tydperk van geldigheid

10. (1) Hierdie statutêre maatreël tree op 1 Oktober 2016 in werking en verval op 30 September 2020.
- (2) Nieteenstaande die bepalings van subklousule (1) kan die Minister, na 'n evaluasie en hersiening van die maatreël kragtens artikel 9(1)(f) van die Wet, by kennisgewing in die Staatskoerant bepaal dat die maatreël op 'n datum in daardie kennisgewing uiteengesit, verval: Met dien verstande dat sodanige datum nie later mag wees as die datum kragtens subklousule (1) bepaal nie.